

乙亥志稿

章欽亮著



地 220.197

42+3

212

乙亥志稿序

吾婁自明弘治建州後桑懌民先生始創太倉州志厥後張仲明先生張南郭先生踵爲之清乾隆初邑宰金上侯先生別爲鎮洋縣志嘉慶時青浦王蘭泉先生以大司寇致仕州牧鼇伯麟先生聘纂直隸太倉州志蘭泉先生負文章重望蒐采完備當時稱爲鼇志咸豐初錢伯瑜先生遂有壬癸志稿之作距鼇志五十餘年僅傳人物餘則闕如光宣間先師王文貞公繼纂州縣志故鄉文獻聿闡幽光顧王志刊成雖在宣統以後而其紀述人文實斷自光緒初年迄今又六十載矣其間風

乙亥志稿

序

一

俗之變遷政治之沿革聲明文物之盛衰懼就湮沒邦人士爰有修續志之議謬推文治與聞其事世弟王君慧言文貞公哲嗣也頗稔桑梓掌故遂請其屬草并商諸錢君誦三各就所知略加增益仿壬癸志稿例先將人物一門付印就正於父老昆季焉人物者一國之砥柱亦一鄉一邑之命根也吾邑人才始盛於明代太原以勲業煊當時琅邪以文章著壇坫煙客先生以名閥耆儒精畫理傳弈禊理學則有尊道安道孝友貞介諸大賢經學則有忍庵抱桐敬亭諸鉅著詩家則有鹿樵世稱詩史厥後復有周子俶王端士等十子程迓亭先

生崛起著作等身其所輯烏吟集披華啓秀爲平陽婁  
東詩派之先河秋帆宮保聲問彪炳經訓菑畚幕僚之  
盛與阮儀徵相伯仲彭甘亭先生駢四儷六符采複隱  
亦頗膾炙人口於是王氏有婁水文徵之輯邵氏有婁  
東雜著徐氏有婁水琴人集之編郁郁乎盛哉咸同後  
稍衰替矣然卽此六十年中若王文貞師正學碩望爲  
藝林宗匠陸文慎師忠謀盡節卓然有古大臣風裁陸  
蔚庭先生謹慎循良躬行儉德舉可師可法他如張君  
拙嘉畢君枕梅姚君柳屏文采風流雅負令望至如閩  
閣名媛義烈節行亦往往不絕間閱近代搢紳全書贊

乙亥志稿

序

二

吾邑曰敦本畏刑崇文知恥蓋江蘇全省六十餘州縣  
所未嘗有於是知陸桴亭諸先生講學之功沾溉於無  
窮也先大夫嘗言中興之時若曾胡左諸公其政學合  
一體用兼賅實肇自桴亭先生溯其宗旨則曰尙志居  
敬以植其本致知格物以會其通天德王道以綜其全  
盡性至命以要其極然則吾鄉風氣之純樸其本原蓋  
可知矣文治年十四五時輒聞里閭新進某也賢某也  
才某也文學若發而穎豎學校如林譽髦斯士蓋庠序  
有正學而後社會有正人國家有正氣詩曰雖無老成  
人尙有典型深願吾鄉後起常以先正典型懸諸心目

間父詔其子兄勉其弟庶幾造出類拔萃之英膺霖雨  
蒼生之寄正人心善國性禦外侮救生民或者導源於  
吾鄉焉文治固常執簡躬躬夙夜寤寐以求之者也歲  
在旃蒙大淵獻涂月邑人唐文治謹序

吾邑縣志最近修於紀元之初詩棣侍王文貞師及同時纂修諸公閱四年而脫稿又閱一年而刊成其間有壬癸志稿光緒初年志稿以爲依據始得完成全書可謂其難其慎矣前歲省令徵編新志邑侯陶君牧聘邦人士續修同人推唐茹經先生爲總纂其他諸君子爲分纂祇以世變日亟人事紛迄無成就唐先生恐年湮代遠文獻闕遺將無告厥成功之日倣族曾叔祖頤壽中丞壬癸志稿之例先成人物志稿邑人聽其議爰將采訪所得之碑誌傳狀由分纂王君慧言輯成初稿再經總纂詳加審定成名宦傳一卷古今人物傳一卷

乙亥志稿

跋

一

藝術列女傳各一卷稿成付印署之曰乙亥志稿蓋先生仍本前志未竟之意也竊憶中丞公當咸豐初年軍書旁午江左騷然因而輟筆今者省府大吏方將搜羅耆獻發揚文化由邑史而編省史國史民族史世界史以臻於大同之治則吾邑新志先之以人物樹厥初基俟異日進行續編彙成全璧不禁馨香以祝之詩棣謬廁分纂追隨唐先生之後媿無裨益猥承摯愛囑誌數語用敢述其涯略於簡末邑人錢詩棣謹跋

乙亥志稿例言

一吾邑志乘最後修於光宣之間至民國七年而刊成  
二十年邑人建議續修舉定分纂若干人謬推文治爲  
總纂遷延數載迄無成稿蓋以政變後百務更新卽一  
方之事頭緒紛繁載筆非易全志一時難以告成今援  
錢中丞寶琛壬癸志稿之例先輯名宦傳一卷人物傳  
三卷題曰乙亥志稿取草創之意云爾

一名宦三十年來惟吳傅二公政績卓卓在人耳目其  
他不敢濫列民國後洪知事錫範楊警佐瑛皆爲本邑  
人故仍入之人物

乙亥志稿

例言

一

一舊志人物爲王文貞先生祖舍一手所纂

列女孫徐君  
福塘續輯

先生嘗謂人物一門南郭志頗謹嚴乾隆縣志已稍假  
借嘉慶州志尤多泛濫故於同光間人多未著錄蓋援  
名宦鄉賢身後三十年之例以俟日久論定今又近三  
十年矣凡有勳業學行可傳者依次立傳其歿於近今  
者亦一體列入誠以世變日亟耆舊彫零昔人惟恐其  
泛濫今日惟恐其湮沒此論世之苦衷也

一吾邑舊分太倉州鎮洋縣民國以後并爲太倉縣茲  
編所載多屬科第或庠序中人籍貫不同勢不得不仍  
其舊故昔時屬於縣籍者各系鎮洋二字爲別

一列女舊分節烈貞孝等目今所續無多統爲一卷其無事實者並列於後蓋時代先後亦不盡悉也咸豐庚申之變殉難婦女見於昭忠錄者十餘人爲舊志所遺補列各傳之前以表闡幽之義

一原任分纂人物者爲朱君文熊徐君豐燾王君保憲三人朱君不幸作古徐君又以病辭此稿由文治偕王君輯成各據傳狀碑誌暨採訪所及者著之志傳之體向取簡核今稍加詳以待後人採擇

一全志各門類如狄君辰吳君瑞霖任黨務記軼聞蔣君乃均吳君錫麟任天文地理教育社會宗教錢君詩

乙亥志稿

例言

二

棣任內政陸君祖馨任財政司法洪君保嬰任兵事水工楊君耀鑒任交通物產徐君豐燾王君保憲任藝文金石等正在屬稿俟次第告成卽當續印以成全璧

中華民國二十四年秋九月里人唐文治謹識

乙亥志稿目錄

名宦

吳熙

傅振海

人物一 古今人傳

畢楚珍

王晷

顧師軾

蔣應宸

胡汝直

錢欽德

王汝騏

孫壽銘

張曾望

張書笏

弟書銘 子慶同

蔣銘勳

子汝坊

陸繼輝

楊欽琦

父綬恩 從兄欽弼 從弟欽軾

乙亥志稿

目錄

聞福增

弟福圻 顧聘璜

陸寶忠

王壽枏

子鳳璘

錢大治

父維鈿 兄大法 子詩楨

楊泰煥

弟泰荃 陸厚基

唐受祺

祖森階 父學韓

王祖畬

孫鴻棧

王毅

父榮年

錢溯耆

弟溯時 族弟泰階 子綬

陸彥珍

吳從庚

子廷祁

徐敦穆

繆朝荃

毛華

子祖樸

顧元爵

子思義 思遠

黃鏡渠

陸壽慈

子炳章 澤永

汪曾蔭

從弟曾保

毛壽貽

錢溯灝

金簾

李文釗

張樹棠

徐乃楫

汪承第

兄承書

沈嘉澍

馮如衡

俞書祥

畢光祖

洪炳彝

姚鵬圖

趙鈞炤 張培埭 李以炳 陸朝琮 王乃昌 季汝梅 徐福壩

陳寶書

父錫圭 兄子敬熙

陸邁

張宇

沈蘭徵

朱錦濤 郁宗欽

朱文熊

朱大椿

李聯珪

洪錫範

楊瑛

王廷圻

項堯仁

乙亥志稿

目錄

人物一 藝術傳

王兆鶴

子朝棟 孫蘊輝

王臣颺

從弟德馨 從子延慶 從孫光裕 光大

徐福謙

錢大濟

王藻林

錢慶椒

倪旭華

王禮

父松 叔父煥 周豫元

傅松元

武翰銘

王開元

黃壽錢

俞慶恩

人物三 列女傳 傳目未錄

乙亥志稿

名宦

吳熙字俊卿雲南保山人光緒元年舉人由內閣中書改知縣歷署金匱武進南匯等縣二十七年補鎮洋時有許金福者爲州署勇目橫行不法熙索諸州守嚴懲之風紀肅然三十一年夏因提倡新政籌辦學校遂有人議裁書院諸生以書院學校兩不相妨請緩裁撤好事者遽以阻撓學堂登諸報章電聞大府委員查辦幾興大獄熙察其實力請於知州謝陶合詞詳覆事獲已明年秋水潦爲災穀價騰湧西南鄉低區之民一呼應

乙亥志稿

名宦

一

者千百司其事者束手無措或欲請兵彈壓熙亟止之而自往娓娓開導一面出示安民民皆歡呼而散其他除暴安良整飭風俗之政不與州分畛域而治任六年調吳縣士紳繪圖爲詩文送行國變後避居滬上越四年卒年六十二

傅振海字曉淵浙江諸暨人以拔貢生就職直隸州州判光緒三十一年署太倉州同銳意興利除弊每微服途行周察民間疾苦日與黃童白叟講論忠孝節義環聽者百數十人有感動泣下者各鄉爭以事赴愬惟擇其有關風化者略治之人人得至其前盡其情不數月



間頌聲載道州屬崇明有毀學事民情洶洶縣令閉城  
請兵勦振海奉委往勘曰此愚民非亂民也請電止兵  
宣諭撫循之事遂解任十有五月瓜代晉省士民勒石  
誌去思後任太平廳同知功德尤著不名一錢國變後  
就吳中修志之聘寓居滄浪亭數年卒振海事親至孝  
劉民有不孝者其母以忤逆聞不施鞭朴但令其母子  
來署觀振海之侍奉其母子大感泣曰我殆非人誓不  
復有忤逆事乃遣之去時人比諸陸清獻至今傳青天  
之目猶在口碑云

乙亥志稿

名宦

二

乙亥志稿

人物一 古今人傳

畢楚珍字士珩瀧孫嘉慶二十三年舉人考取景山學  
教習道光十一年選授贛榆教諭贛邑文風久不振鮮  
膺鄉薦者楚珍以作育人才爲己任嚴課諸生拔其俊  
秀者親爲講授寒暑無間未幾有相繼登甲科者鄰邑  
沈陽荐饑海州牧廉楚珍才檄司振事徒步稽核分別  
等差民沾實惠次年又檄捕蝗晝夜盡勞匝月而蝗蝻  
盡歲賴有秋秩滿以知縣分貴州歷署綏陽桐梓涪潭  
畢節諸縣皆有政聲綏陽里徭繁重民久病之楚珍下

乙亥志稿

人物一

一

車卽爲裁革民立生祠祝之任畢節時值歲不登請發  
倉以振格於吏議楚珍獨力任之捐俸爲倡次年復疫  
楚珍固精岐黃術日坐廳事診視施餌自夏徂秋所活  
無算畢邑之民德之繪像以頌遺愛是時粵匪洪秀全  
反荔波與粵吠澮相接大府思得幹吏以堵其衝飛檄  
調楚珍任荔波楚珍星夜馳往召募勇士繕城垣緝奸  
宄孤城卒安全以積勞得疾謝病歸就養於子庭璜灌  
雲尉任所咸豐六年卒年六十四

王巖原名曦字季旭原祁五世孫監生美丰儀瀟灑雋  
爽少時喜跳盪鼓舞之游後悔之終身不蹈前失尤篤

倫理輕財利工詞曲通律呂每酒酣耳熱抗聲高歌或以長笛洞簫譜之爲文奇氣盤鬱而十試秋闈不遇遂以游幕終其身嘗佐聊城令章某章以廉吏稱去官之日貧甚且虧官帑累累最罄其所蓄以助吏民感之爭爲集資遂免彈劾道光二十六年卒於武昌年四十九顧師軾字雪堂諸生性孝友恬淡寡欲年二十餘喪妻不復娶弟某兒女累重師軾時其困乏無稍吝好吟詠尤留心鄉邦文獻亂後采訪死事者爲太鎮忠義錄又輯節孝錄丰裁嚴肅教後生必以禮法談論故鄉文獻娓娓不倦晚舉鄉飲介賓光緒十年卒年八十七

乙亥志稿

人物一

二

蔣應宸字星齋諸生性耿介嫉惡工吟詠教授鄉里會粵寇之亂避居鄉間僞師帥耳其名聘之跳而免旋被執至城見僞佐將丁德勝命爲書士以老力辭刃擬其頸不爲動囚之二十餘日得釋著難中吟一卷有云予之壯也不如人老豈甘爲賊幕賓任爾諄諄勸駕肯從威逼負君親卒年六十九

胡汝直字古愚鎮洋諸生授徒數十年性嚴正不苟教誨生徒必誠必懇有過則斥責不少假借外甥張某兄弟自賊中逃歸汝直衣食教養之歷十餘年皆成立工書法筆意在蘇米之間所書匾額楹聯流傳甚多晚舉

鄉飲介賓光緒四年卒年六十七同時錢欽德字子宣  
坪六世孫監生亦以教讀爲業里中善舉多所贊襄經  
理文社及育嬰最久舉鄉飲介賓再舉大賓卒年八十  
七

王汝騏字駉謀賓玄孫道光二十六年舉人四試禮部  
年未四十卽絕意進取授徒養親往來江南北歷主海  
門師山書院及里中婁東安道兩書院講席垂四十年  
與當道歲時一刺外絕不通干謁生平不務廉介名而  
取與不苟爲學以躬行實踐守正不欺爲旨少以詩賦  
受知學使者張芾冠蘇太兩屬旣乃泛濫於唐宋六家

乙亥志稿

人物一

三

之詩風格適上徐敦穆稱其性嫉惡臆中不能容齷齪  
故於詩亦多激楚之音光緒二十四年卒年七十七  
孫壽銘字新甫壽祺弟咸豐二年順天舉人授福建清  
流知縣調侯官擢臺灣南路海防同知歷署連江知縣  
鹿港同知臺灣知府興化知府福州海防同知攝福州  
知府宦閩凡二十年所至革陋規清庶獄興賢育才士  
民交頌其任侯官紳民以墳山訐訟久不決大府袒紳  
壽銘廉得實卒直民任鹿港捐設書院定期考校自是  
春秋闡有獲雋者去之日邑人爲建生祠任福防遇中  
外交涉事每執約力爭曰官可罷約不可踰必如約而

後已其氣節剛勁人皆以爲難任興化屬邑莆田悍好鬪訟棍乘機愚弄爲民害壽銘密訪著名首犯置於法其風稍戢光緒九年以省墓歸越二年卒年六十七壽銘自幼至老好學不倦凡經史小學下逮醫卜星相風鑑之術靡不參究歸之日囊無長物攜圖書數十篋而已

張曾望字孫鄂諸生早歲入都名動公卿間相國彭蘊章延之賓館應奉文字皆出其手淮軍東下佐楊宗濂戎幕多所贊畫敍功保訓導加五品銜游幕垂三十年歸主講安道尊道兩書院一時俊彥多出其門光緒十

乙亥志稿

人物一

四

八年卒年六十五曾望天才卓越博聞強識議論豪邁常傾座人兼擅各體文詩尤侷儻有才氣同治庚午鄉試未終場而母訃至同寓者說以匿喪畢試曾望大慟曰是雖中式亦爲名教罪人矣遽奔歸然竟垂老不遇人以爲才豐命嗇云

張書笏字秉璵懋勳孫歲貢生少負文名家貧設帳授徒館蘇州最久凡經指授文學俱有師法一時有安定門生之目自後郡中顯宦欲爲子弟得師爭延太倉人其聲譽實自書笏始亂後地方公益事如賓興公車及餼廩之費呈請立案勒石每值學使案臨聯名請旌忠

義節孝具呈公舉鄉飲賓書笏提倡之力尤多晚歸里  
主講安道尊道兩書院卒年六十七弟書銘字仲丹鎮  
洋恩貢生好學不倦評點書籍盈篋亦久館於蘇勤誨  
弟子如其兄書笏子慶同字竺三鎮洋籍光緒元年舉  
人擅詞翰釋褐後益覃心經世之學十五年大挑得教  
諭又考取八旗官學教習年未五十卒

蔣銘勳字亦榭治孫鎮洋諸生同治初巡撫李鴻章督  
師滬上同里錢鼎銘設糧臺於清江浦招銘勳襄理旋  
奉鴻章檄調大營入治軍書出籌餉運積功保湖北知  
府光緒元年鄂督李瀚章被命赴雲南查辦馬嘉理案

乙亥志稿

人物一

五

以銘勳夙諳交涉事奏充隨員五年補荊州知府荆屬  
東境與沔陽夾洪湖爲界恃湖蓄洩沔之莠民於湖西  
口子貝淵築隄謀壅水專利致與荆民啓釁械鬪銘勳  
督營兵擒治其魁立命決隄事遂定萬城大隄爲下游  
諸郡屏蔽銘勳歲加修築會江水暴漲得無害秩滿援  
例以道員用督辦宜昌川鹽局十五年瀚章移督兩廣  
奏調至粵總辦洋務深倚重之十九年卒年六十二瀚  
章奏請優卹特贈內閣學士銜予祭葬蓋異數也子汝  
坊字伯言鎮洋諸生援例爲員外郎光宣之際厲行新  
政汝坊獨得風氣之先捐資創辦電報學堂造就甚多

又設濟泰紗廠以興實業其他學務財政諸大端多所  
擘畫民國二十三年卒年七十五

陸繼輝字蔚庭增祥子同治十年進士改庶吉士散館  
授編修直史館充光緒丙子北闈分校歷典己卯湖北  
己丑江西兩省鄉試光緒二十年授陝西漢中知府未  
赴丁母憂服闋授河南汝甯知府汝甯故多盜時值饑  
饉盜益熾繼輝嚴保甲設巡兵加意休養民以安息義  
和團起屬境騷然繼輝處以鎮靜奸民之煽亂者治之  
事寢已蘆漢鐵路道經屬邑工與民輒齟齬肇釁繼輝  
親爲剖決卒無事在郡八年公牘之稍有關係者必手

乙亥志稿

人物一

六

自屬稿至疾篤不輟三十一年卒於官年六十六繼輝  
學問淹貫尤好金石蒐羅考訂不倦以增祥著有金石  
補正因輯爲續編少工繪事法南田兼及白陽後以勤  
於政事不復作焉性純謹篤實崇尚儉德簡試官及出  
守行李親自檢點訓子弟門生諄諄以敦品勤學爲勛  
而氣節狷介不與時俯仰在詞垣二十餘年充國史館  
提調出入禁庭七八載四邀記名始得出守其在外也  
兩奉嘉獎計典膺上考而卒未遷一階移一郡足徵其  
品詣云

楊欽琦字魏卿雲煜曾孫父綬恩在東鄉新塘市殉粵